

## **32/2020 Foru Dekretua, abenduaren 22koa, TicketBAI betebeharra garatzen duen Erregelamendua onesten duena.**

### **AZALPEN OHARRA**

Testu hau dibulgaziozkoa da soilik, eta ez du inolako izaera ofizialik. Eguneratutako Erregelamendua eta berau onartzen duen Foru Dekretua jasotzen da bertan.

Testuaren bukaeran, erregelamenduaren zenbat artikulua aldatu dituzten xedapenen zerrenda ere ageri da.

Berriki onetsi den azaroaren 6ko 3/2020 Foru Arauak, iruzur fiskala eragozteko lanabes teknologikoak erabili beharra ezartzen duenak, berekin ekarri du gauzatzea zerga ihesa eta iruzur fiskala galarazi eta detektatze aldera Ekonomia Lankidetzeta eta Garapenerako Antolakundeak (ELGA) konponbide teknologiko eraginkorrak ezartzeko egin dituen gomendioak. Zehazki, hizpide dugun iruzur fiskala da diru sarrera gutxiago aitortzea salmenta elektronikoak ezabatzen direnean, eta gastu handiagoak aitortzea faktura faltsuak erabiltzen direnean.

Era berean, aipatutako araua onartzean Gipuzkoak pausu kualitatibo bat eman du Euskal Autonomia Erkidegoko Iruzur Fiskalaren aurka Borrokatzeko Batzordeak landutako estrategia komuna ezartzeko garaian, sektore jakin batzuetan fakturazio sistemak kontrolatzeko tresnen ezarpena aztertzea ahalbidetzen duen heinean.

Zerga iruzurra eragozteko helburu duten tresna teknologikoak erabiltzeko obligazioa dela medio –sozietateen gaineko zergaren, ez-egoiliarren errentaren gaineko zergaren eta pertsona fisikoen errentaren gaineko zergaren foru arauak aldatuz ezarri da obligazio hori onartutako foru arau horretan–, zergadunak behartuta geratzen dira fakturazio sistemetan neurri teknologiko aurreratuak erabiltzera tresna teknologiko berriak baliatuta, eta horrek ahalbidetuko du jarduera ekonomikoak egiten dituzten pertsona fisikoen eta pertsona juridikoen tributazioa kontrolatzea, haien tamaina edo eragiketa bolumena edozein dela ere.

Bere artikuluetan zehar, foru arauak hainbat gai uzten ditu erregelamenduz garatzeko, eta horrexek egiten du beharrezko foru dekretu hau onartzea.

Hortaz, foru dekretu honen xedea da zerga iruzurra eragozteko helburu duten lanabes teknologikoak erabiltzeko betebeharra garatzea, betebeharraren horren erregulazioa osatuko duen erregelamendu bat onartuz.

Erregelamenduari «TicketBAI betebeharra garatzen duen Erregelamendua» deitu zaio modu laburtuan, eta arrazoia da izen horrekin sinplifikatu nahi izan dela nola izendatu behar den ondasun entregak eta zerbitzu prestazioak dokumentatzen dituzten fitxategien osotasuna, kontserbazioa, trazabilitatea, bortxaezintasuna eta igorpena bermatuko dituen sistema informatiko bat erabiltzeko betebeharra. Hortaz, betebeharraren horri TicketBAI betebeharra deituko zaio erregelamendu honen ondorioetarako, baita gainerako zerga araudiaren ondorioetarako ere.

Erregelamenduak zazpi kapitulu ditu, hogeita hiru artikulua, bi xedapen gehigarri eta azken xedapen bat.

Atariko kapituluak xedapen orokorrak biltzen ditu, hiru artikulutan garatuak, eta horietan gai hauek arautzen dira: xedea, aplikazio eremua, eta, erregelamendu honen ondorioetarako, eta hura garatzen duen araudiaren ondorioetarako ere, hainbat terminoren esanahia zehazten duten definizioak eta erreferentziak.

I. kapituluak, hiru artikuluz osatuak, betebeharraren aplikazio eremuaren mugak ezartzen ditu. Horrela, zehazten du zein kasutan dauden zergadunak TicketBAI betebeharretik salbuetsita. Orobat, salbuespen partzial bat arautzen du, eragiketaren fakturan edo frogagirian QR kodea jartzeko betebeharretik salbuesten duena.

II. kapituluak bi artikulua biltzen ditu, eta bertan TicketBAI betebeharraren konplimentuaz jarduten du, bi gai hauek garatuz: betebeharra betetzeko gaituta dauden pertsonak, eta betebeharra betetzeko erabili daitezkeen baliabide informatikoak.

III. kapituluak bost ataletan banatuta dago, eta bederatzi artikulua ditu. Horietan zehar arautzen da zer behar izan behar dituen erabiltzen den sistema informatikoak –TicketBAI softwarea izenekoak– ondasun entregak eta zerbitzu prestazioak dokumentatzen dituzten fitxategi informatikoen osotasuna, kontserbazioa, trazabilitatea, bortxaezintasuna eta igorpena bermatzeko.

Hala, aurrenik ezartzen da TicketBAI softwarearen baldintzak zein ordenatan bete behar diren, eta hiru ekintza bereizten dira: fitxategiaren sorrera, fitxategiaren igorpena, eta fakturan edo frogagirian TicketBAI kodea eta QR kodea txertatzea.

Horren ondoren, TicketBAI fitxategien sorrera garatzen da, eta halakotzat hartzen dira bai altako fitxategiak bai eragiketak baliogabetzekoak. Horrela, bertan ezartzen da eragiketaren faktura edo frogagiria egin baino lehen, TicketBAI softwareak TicketBAI altako fitxategi bat sortu behar duela ondasun entrega edo zerbitzu prestazio bakoitzeko. Orobat, zehazten da alta emateko zein eragiketak baliogabetzeko fitxategiek izan behar duten informazioa, eta fitxategi horiek elektronikoki sinatu behar direla ere ezartzen da.

Hirugarrenik, TicketBAI fitxategiak Zerga Administrazioari nola bidali behar zaizkion arautzen da. Horri dagokionez, nabarmentzekoa da fitxategia bidaltzeko unea, eragiketaren faktura edo frogagiria egiten den une berean bidali behar baita. Argi utzi behar da aldibereotasun hori pertsonak edo entitateak faktura edo frogagiria egiten duen unearikiko ulertzen dela, ez pertsona edo entitate hartzaileari hura bidaltzen edo entregatzen zaion unearikiko.

Aurrerago, ondasun entregak edo zerbitzu prestazioak dokumentatzen dituzten faktura edo frogagiritan TicketBAI kode bat eta QR kode bat sartzea garatzen da.

Bukatzeko, ezartzen da nola jokatu behar den TicketBAI betebeharra betetzeko garaian gorabehera teknikoak eragin ditzaketan kasu berezietan.

IV. kapituluak artikulua bakarra du, eta haren barruan arautzen da zergadunak TicketBAI softwarearekin egindako eragiketen alta eta baliogabetze fitxategiak gordetzera behartuta daudela zergen foru arau orokorrak betebeharrak formalei dagokienez aurreikusten duen epean.

V. kapituluak bi artikulua ditu, eta horietan zehazten da TicketBAI betebeharraren konplimentuaren egiaztapena bai hartzailearen aldetik, horretarako eskura jarriko zaion aplikazio informatikoaren bitartez, bai Zerga Administrazioaren aldetik ere, hala badagokio.

VI. kapituluak hiru artikulua osatzen dute, eta bertan TicketBAI Softwarearen Erregistroa arautzen da, bertan inskribatzeko baldintzak ezartzeaz gainera. Horretarako, aurreikusten da alta aitortzen bat aurkeztea, eskuragarri izango den

formularioa erabilia, eta hari erantzukizunpeko deklarazio bat eranstea, softwarea garatzen duen pertsonak edo entitateak sinatu behar duena.

Orobat, prozedura bat arautzen da erabilitako softwareak TicketBAI Softwarearen Erregistrotik baztertzeko, zeinaren bukaeran softwarea erregistrotik kanpo gera baitaiteke ez-betetzea prozeduran zehar zuzendu ez bada.

Erregelamenduak bi xedapen gehigarri ditu: lehenengoak TicketBAI altako fitxategiaren edukiari buruzko berezitasunak ezartzen ditu faktura sinplifikatuak egiten diren kasuetarako; bigarrenak, berriz, bidaia agentziek berezkoa duten berezitasun bat jasotzen du.

Erregelamenduaren azken xedapen bakarrean arauak emateko ahalmena jasotzen da, nahiz eta bere artikuluetan zehar Ogasun eta Finantza Departamentuko foru diputatuari gaikuntza ugari egiten zaizkion, garatzen diren gaiak oso teknikoak direlako, esate baterako, TicketBAI softwareak eta fitxategiek bete behar dituzten zehaztapen tekniko eta funtzionalak, eta izaera bereko beste batzuk.

Bestalde, foru dekretuak artikulua bakarra, bi xedapen gehigarri, xedapen iragankor bakarra eta azken lau xedapen ditu.

Lehen eta bigarren xedapen gehigarriek ahalbidetzen dute TicketBAI betebeharra borondatez betetzea 2021eko urtarrilaren 1etik ezarpen egutegiaren arabera hura nahitaez bete beharrekoa izan arte.

Xedapen iragankor bakarrak TicketBAI betebeharra ezartzeko egutegia finkatzen du, eta, haren arabera, zergadunak 2022ko urtarrilaren 1etik abenduaren 1era bitartean egongo dira behartuta TicketBAI betebeharra betetzera, nahiz eta datak aldatu egiten diren egiten duten jarduera zein epigrafetan dagoen. Era berean, argitzen da jarduera bat baino gehiago eginez gero, TicketBAI betebeharra horietako bati dagokionez ezartzeak gainerako jarduerentzat ere derrigortzen duela.

Azken xedapenei dagokienez, bertan hiru erregelamendu aldatzen dira, eta bai foru dekretua eta bai erantsitako erregelamendua indarrean noiz jarriko diren ezartzen da.

Hiru erregelamendu hauek aldatzen dira: fakturatzeko obligazioak arautzen dituen Erregelamendua, otsailaren 26ko 8/2013 Foru Dekretuaren bidez onetsia; zerga betebeharrak formal jakin batzuk garatzen dituen Erregelamendua, abenduaren 17ko 47/2013 Foru Dekretuaren bidez onetsia; eta Gipuzkoako Lurralde Historikoko zerga kudeaketari eta zerga arloko jarduketari eta prozeduren arau komunei buruzko Erregelamendua, apirilaren 21eko 5/2020 Foru Dekretuaren bidez onetsia.

Fakturazio obligazioak arautzen dituen erregelamenduko aldaketei dagokienez, nabarmentzen da eragiketen frogagarria egiteko betebeharra ezartzen dela pertsona fisikoen errentaren gaineko zergaren, sozietateen gaineko zergaren eta establezimendu iraunkorra duten ez-egoiliarren errentaren gaineko zergaren ondorioetarako fakturarik egitera behartzen ez duten eragiketari jakin batzuentzat.

Zerga betebeharrak formal jakin batzuk garatzen dituen Erregelamenduko aldaketari dagokionez, alde batetik, zerga errolda berri bat gehitzen da: TicketBAI Softwarearen Erregistroa. Bestetik, ezinbestezkoa den aldaketa bat sartzen da fakturazio erregistroen hornidura elektronikoaren bidez, hau da, berehalako informazio horniduraren bidez (BIH) balio erantsiaren gaineko zergari dagokionez bidaltzen diren erregistro liburuaren edukia egokitzeko. Izan ere, ezarrita uzten da TicketBAI betebeharra betetzeko Zerga Administrazioari igortzen zaion informazioa

baliagarria izango dela BIHren faktura liburuetarako ere, eta horrek ez duela galaraziko betebeharraren ondorioz igorri behar den informazio gehigarria bidaltzea, TicketBAI fitxategian jasotakoaz aparte. Dena den, aukera hori juridikoki eta teknikoki garatzen ez den bitartean, nahitaezkoa izango da informazio guztia ematen jarraitzea.

Azkenik, ezartzen da foru dekretua eta erantsitako erregelamendua Gipuzkoako Aldizkari Ofizialean argitaratuko den egunean bertan jarriko direla indarrean, 2022ko urtarrilaren 1etik aurrerako ondorioekin, xedapen gehigarrietan jasotakoa eragotzi gabe.

Urtarrilaren 17ko 3/2014 Foru Arauak, Pertsona Fisikoen Errentaren gaineko Zergarenak, eta urtarrilaren 17ko 2/2014ko Foru Arauak, Sozietateen gaineko Zergarenak, azken xedapenetako bigarrenean esaten dute Gipuzkoako Foru Aldundiak eta Ogasuneko eta Finantzetako foru diputatuak behar diren xedapen guztiak eman ditzaketela foru arau horiek garatu eta exekutatzeko.

Horrenbestez, Ogasun eta Finantza Departamentuko foru diputatuak proposaturik, Lege Aholkularitzako Batzordearekin bat etorritik, eta Diputatuen Kontseiluak gaurko bileran eztabaidatu eta onartu ondoren, honako hau

## **XEDATZEN DUT**

### **Artikulu bakarra. TicketBAI betebeharra garatzen duen Erregelamendua onestea.**

Onetsita geratzen da TicketBai betebeharra garatzen duen Erregelamendua, foru dekretu honetan eranskin gisa jasotzen dena.

### **Lehen xedapen gehigarria. TicketBAI betebeharra borondatez betetzea 2021eko urtarrilaren 1etik aurrera.**

1.<sup>1</sup> Zergadunek 2021eko urtarrilaren 1etik xedapen iragankor bakarrean xedatutakoaren arabera nahitaez bete beharrekoa izan arte bete ahal izango dute beren borondatez TicketBAI betebeharra.

2. TicketBai fitxategikoa ez den informazio osagarria, hain zuzen ere, zerga betebeharraren formal jakin batzuk garatzen dituen Erregelamenduak, abenduaren 17ko 47/2013 Foru Dekretuaren bidez onetsiak, 36.5 artikuluko laugarren paragrafoan aipatua, nola eman behar den garatzen ez den bitartean, erregistro liburuak egoitza elektronikoaren bidez eramatera behartuta dauden zergadunek (5. paragrafo horretan aurreikusitakoaren arabera) oso-osorik jarraitu beharko dute betetzen betebeharraren hori.

### **Bigarren xedapen gehigarria. TicketBAI Softwarearen Erregistroa abian jartzea 2022ko urtarrilaren 1a baino lehen.**

Lehen xedapen gehigarrian aipatzen den TicketBAI betebeharra zergadunek beren borondatez bete ahal izan dezaten, TicketBAI Softwarearen Erregistroa abian jarriko da erregelamendu hau indarrean jartzen den egunean.

---

<sup>1</sup> Apartatu hau abenduaren 28ko 15/2021 Foru Dekretuaren 4. artikulua aldatu du. Aipatutako foru dekretuak TicketBAI betebeharraren Erregelamendua onesten duen foru dekretua, zerga betebeharraren formal jakin batzuk garatzen dituen Erregelamendua, eta Pertsona Fisikoen Errentaren gaineko Zergaren eta Sozietateen gaineko Zergaren Erregelamenduak aldatzen ditu, eta ondare elementuen eskualdaketan lortutako errentak bi zerga horietan zehazteko 2022an aplikatu beharreko eguneratze koefizienteak onesten ditu (2021/12/30eko GAO). Foru dekretua Gipuzkoako Aldizkari Ofizialean argitaratzen den egunean sartzen da indarrean, eta aldaketak 2022ko urtarrilaren 1etik aurrerako ondorioak ditu.

Horretarako, data horretatik aurrera, erregelamendu honen VI. kapituluaren xedatutakoa aplikatuko da.

## **Xedapen iragankor bakarra. TicketBAI betebeharra ezartzeko egutegia.<sup>2</sup>**

1. Zergadunak TicketBai sistema erabiltzera behartuta egongo dira, kontuan hartuta zer jarduera enpresarial, profesional edo artistiko egiten duten apirilaren 20ko 1/1993 Foru Dekretu Arauemaileaz onartutako Jarduera Ekonomikoen gaineko Zergaren Testu Bateginaren arabera, ezarpen egutegi honi jarraituz:

a) 2022ko urtarrilaren 1ean, hauek egongo dira behartuta:

- Zerga arloko kudeaketa zerbitzuak ohikotasunez egiten dituztenak, azaroaren 5eko 582/2014 Foru Aginduaren 9. artikuluan aipatuak.

- Lehen xedapen gehigarriaren indarrez 2021ean TicketBAI betebeharra borondatez betetzea aukeratu ondoren, 2022ko urtarrilaren 1etik aurrera betebehara hori betetzen jarraitzen dutenak.

b) 2022ko martxoaren 1ean, epigrafe hauetako jarduerak egiten dituztenak egongo dira behartuta:

- 1. sekzioan, 834. eta 849. talde bitartekoak.

- 2. sekzioan, 011. eta 841. talde bitartekoak.

c) 2022ko maiatzaren 1ean, epigrafe hauetako jarduerak egiten dituztenak egongo dira behartuta:

- 1. sekzioan, 641. eta 665. talde bitartekoak eta 671. eta 687. talde bitartekoak.

- 2. sekzioan, 851. eta 899. talde bitartekoak.

d) 2022ko urriaren 1ean, epigrafe hauetako jarduerak egiten dituztenak egongo dira behartuta:

- 1. sekzioan, 501. eta 508. talde bitartekoak; 691. eta 757. talde bitartekoak; 833. taldea; eta 851. eta 999. talde bitartekoak.

e)<sup>3</sup> 2022ko abenduaren 1ean, epigrafe hauetako jarduerak egiten dituzten zergadunak egongo dira behartuta, bai eta nekazaritza, mendeko abeltzaintza, basogintza, arrantza jarduerak eta zergaren tarifetan zehaztu gabe dauden gainerako enpresa, lanbide edo arte jarduerak egiten dituztenak ere:

— 1. sekzioan, 011. eta 495. talde bitartekoak; 611. eta 631. talde bitartekoak; eta 761. eta 832. talde bitartekoak.

— 3. sekzioan, 011. eta 059. talde bitartekoak.

f) Lehen xedapen gehigarriaren indarrez TicketBAI betebeharra borondatez betetzea aukeratzen den datatik aurrera, betiere hautu hori 2022an egiten bada.

<sup>2</sup> TicketBAI betebeharra ezartzeko egutegia azaroaren 9ko 608/2021 Foru Aginduaren 1. artikulua aldatu du. Aipatutako foru aginduak TicketBAI betebeharraren ezarpen egutegia aldatzen du eta erretiroa hartzeko adinetik hurbil dauden pertsona fisiko jakin batzuk hura betetzetik salbuesten ditu (2021/11/11ko GAO). Foru agindua Gipuzkoako Aldizkari Ofizialean argitaratzen den egunean sartzen da indarrean, eta aldaketak 2022ko urtarrilaren 1etik aurrerako ondorioak ditu.

<sup>3</sup> Letra hau urriaren 5eko 12/2021 Foru Dekretuaren 7. artikulua aldatu du. Aipatutako foru dekretuak Zergen Foru Arau Orokorra garatzeko erregelamendu jakin batzuk aldatzen ditu (2021/10/8ko GAO). Foru Dekretua Gipuzkoako Aldizkari Ofizialean argitaratu eta biharamunean sartzen da indarrean, eta aldaketak 2022ko urtarrilaren 1etik aurrerako ondorioak ditu.

2. Jarduera bat baino gehiago egiten dituzten zergadunen kasuan, baldin eta jarduera horiek bi epigrafetan edo gehiagotan sartuta badaude eta horiei data desberdin bat ezarri bazaie, TicketBAI betebeharra jarduera guztietarako exijituko da lehenengo jarduerarako ezarri denean.

3. Ogasun eta Finantza Departamentuko foru diputatuak xedapen iragankor honetan aurreikusitako egutegia aldatu ahal izango du foru agindu bidez.

## **Azken xedapenetako lehena. Fakturatzeko obligazioak arautzen dituen Erregelamendua aldatzea.**

Aldaketa hauek sartzen dira fakturatzeko obligazioak arautzen dituen Erregelamenduan, otsailaren 26ko 8/2013 Foru Dekretuaren bidez onetsitakoan:

**Bat.** 6. artikulua 1. apartatuko a) letrari 6. ordinala gehitzen zaio, honako hau dioena:

«6. TicketBAI betebeharra garatzen duen Erregelamenduak, abenduaren 22ko 32/2020 Foru Dekretuaren bidez onetsiak, 17. artikuluan jasotakoaren arabera egindakoak.»

**Bi.** 14. artikulua 2. apartatuari c) letra gehitzen zaio, eta honela dio:

«c) TicketBAI betebeharra garatzen duen Erregelamenduak, abenduaren 22ko 32/2020 Foru Dekretuaren bidez onetsiak, 17. artikuluan aipatzen dituen kasuetan.»

**Hiru.** Azken paragrafo bat gehitzen zaio 26.1 artikuluari, honela dioena:

«Pertsona fisikoen errentaren gaineko zergaren zergadunak behartuta egongo dira, erregelamendu honetako 1. artikuluan jasotakoarekin bat, frogagiria eta kopia egitera, eragiketengatik fakturarik egin behar ez denean erregelamendu honen 3.1 artikuluko a) eta d) letretan aurreikusitakoaren arabera.»

**Lau.** 27. artikulua gehitzen da, honela dioena:

«27. artikulua. Eragiketak sozietateen gaineko zergan dokumentatu beharra.

Zerga honen zergadunak behartuta egongo dira, erregelamendu honetako 1. artikuluan jasotakoarekin bat, frogagiria eta kopia egitera, eragiketengatik fakturarik egin behar ez denean erregelamendu honen 3.1 artikuluko a) eta d) letretan aurreikusitakoaren arabera.»

**Bost.** 28. artikulua gehitzen da, eta honela dio:

«28. artikulua. Eragiketak ez-egoiliarren errentaren gaineko zergan dokumentatu beharra.

Establezimendu iraunkor bidez errentak lortzen dituzten zergadunak behartuta egongo dira:

a) Beren jardueran egiten dituzten eragiketen faktura eta kopia egitera, erregelamendu honetan aurreikusitako eran, balio erantsiaren gaineko zergan aplikatzen duten araubidea edozein dela ere.

Aurreko paragrafoan ezarritako beharkizuna betetzat joko da balio erantsiaren gaineko zergaren nekazaritza, abeltzaintza eta arrantzaren araubide berezira bildutako jardueren garapenean egindako eragiketaren hartzaileak 16.1 artikuluan aurreikusitako ordainagiria egiten duenean.

b) Frogagiria eta kopia egitera, erregelamendu honetako 1. artikuluan jasotakoarekin bat, eragiketengatik fakturarik egin behar ez denean erregelamendu honen 3.1 artikuluko a) eta d) letretan aurreikusitakoaren arabera.»

**Sei.** 29. artikulua gehitzen da, eta honela dio:

«29. artikulua. Eragiketak frogagiri bidez dokumentatzeko betebeharraren erregulazioa.

Eragiketak frogagiri bidez dokumentatzeko betebeharra betetzeko, erregelamendu honen I. tituluari eragiketak faktura bidez dokumentatzeko betebeharrari buruz xedatutakoari jarraituko zaio, 2. eta 3. artikuluetan xedatutakoa aparte utzita.

Eragiketak faktura bidez dokumentatzen direnean erregelamendu honen I. tituluari xedatutakoaren arabera, eragiketak frogagiri bidez dokumentatzeko betebeharra bete dela ulertuko da.»

### **Azken xedapenetako bigarrena. Zerga betebeharraren formal jakin batzuk garatzen dituen Erregelamendua aldatzea.**

Aldaketa hauek sartzeko zerga betebeharraren formal jakin batzuk garatzen dituen Erregelamendua, abenduaren 17ko 47/2013 Foru Dekretuaren onetsitakoan:

**Bat.** 3. artikulua aldatu eta honela berridazten da:

«3. artikulua. Errolda motak.

Gipuzkoako Lurralde Historikoko Foru Ogasunak zerga errolda hauek izango ditu:

- a) Zergapekoen errolda.
- b) Enpresaburu, profesional eta atxikitzaileen errolda. Errolda hau zergapekoen erroldaren parte izango da.
- c) Batasunaren barruko operadoreen erregistroa.
- d) Balio erantsiaren gaineko zergaren hileko itzulketen erregistroa.
- e) Fabrikazio zerga berezien lurralde erregistroa.
- f) Aldi baterako enpresa elkarten erregistro berezia.
- g) TicketBAI Softwarearen Erregistroa, TicketBAI betebeharra garatzen duen Erregelamendua, abenduaren 22ko 32/2020 Foru Dekretuaren bidez onetsiak, VI. kapituluari arautua.

Aurreko c) eta d) letretan aipatutako erregistroak enpresaburu, profesional eta atxikitzaileen erroldaren parte izango dira.

Enpresaburu, profesional eta atxikitzaileen erroldan jasotako datuetatik abiatuta, Sozietateen gaineko Zergari buruzko urtarrilaren 17ko 2/2014 Foru Arauaren 119., 120. eta 121. artikuluetan aipatzen den entitateen aurkibidea eramango du Ogasun eta Finantza Departamentuak.»

**Bi.** 36. artikuluko 5. apartatua honela geratzen da idatzita:

«5. Artikulu honetako aurreko apartatuetan xedatutakoa gorabehera, abenduaren 29ko 1624/1992 Errege Dekretuaren bidez onetsitako Balio Erantsiaren gaineko Zergaren Erregelamenduko 62. artikuluan aipatzen diren erregistro liburuak Gipuzkoako Foru Aldundiaren egoitza elektronikoaren bidez eraman beharko dira, eta, horretarako, enpresaburu edo profesionalek eta zergaren bestelako subjektu pasiboek elektronikoki bidaliko dituzte fakturazio erregistroak, haien likidazio aldian hilabete naturalarekin bat datorrenean aipatutako erregelamenduko 71. artikuluko 3. apartatuan xedatutakoarekin bat.

Gainera, aurreko paragrafoan adierazitako esparruan sartzeko ez diren enpresaburu edo profesionalek eta zergaren beste subjektu pasibo batzuek posible izango dute abenduaren 29ko 1624/1992 Errege Dekretuaren bidez

onetsitako Balio Erantsiaren gaineko Zergaren Erregelamenduko 40.1, 47.2, 61.2 eta 62.1 artikuluetan aipatzen diren erregistro liburuak Gipuzkoako Foru Aldundiaren egoitza elektronikoaren bitartez eramatea erregelamendu honen 36 bis artikuluan ezarritako eran.

Balio Erantsiaren gaineko Zergaren Erregelamenduak, abenduaren 29ko 1624/1992 Errege Dekretuaren bidez onetsiak, 62. artikuluko 4. apartatuan xedatutakoaren ondorioetarako, erregistro liburu bakarrak eramango dira, eta haietan zergaren aplikazio lurraldean kokatuta dauden establezimendu guztien eragiketak jasoko dira.

TicketBAI betebeharra betetz Zerga Administrazioari bidaltzen zaion informazioa baliagarria izango da paragrafo honetan aipatzen den obligazioa, erregistro liburuak egoitza elektronikoaren bidez eramatekoa alegia, betetzeko. Guztiarekin ere, betebeharrak hori dela eta, beharrezko gertatzen bada informazio gehigarria ematea bidalitako TicketBAI altako fitxategian jasotakoaz aparte, informazio gehigarri hori 36 ter artikuluan ezarritako epean eman beharko da.

Fakturazio erregistroen hornidura elektronikoa Gipuzkoako Foru Aldundiaren egoitza elektronikoaren bitartez egingo da, web zerbitzu bat erabiliz edo, egonez gero, formulario elektronikoa bat betetz, hori guztia Ogasun eta Finantza Departamentuko foru diputatuak foru aginduz onartzen dituen erregistro eremuekin bat.

Balio Erantsiaren gaineko Zergaren Erregelamenduan erregelamendu horretako 62.6 artikuluan aipatzen diren pertsona eta entitateei egindako erreferentziak apartatu honetan aipatzen diren pertsona eta entitateei egindakotzat joko dira, eta erregistro liburuak Zerga Administrazioako Estatu Agentziaren egoitza elektronikoaren bitartez eramateari buruzko erreferentziak, berriz, Gipuzkoako Foru Aldundiaren egoitza elektronikoaren bidez eramateari buruzkoak direla ulertuko da.»

### **Azken xedapenetako hirugarrena. Gipuzkoako Lurralde Historikoko zerga kudeaketari eta zerga arloko jarduketa eta prozeduren arau komunei buruzko Erregelamendua, apirilaren 21eko 5/2020 Foru Dekretuaren bidez onetsia, aldatzea.**

Gipuzkoako Lurralde Historikoko zerga kudeaketari eta zerga arloko jarduketa eta prozeduren arau komunei buruzko Erregelamenduak, apirilaren 21eko 5/2020 Foru Dekretuaren bidez onetsiak, 54. artikuluan jasotzen duen j) letra k) letra bihurtzen da, eta j) letra honela geratzen da idatzita:

«j) TicketBAI betebeharra garatzen duen Erregelamenduak, abenduaren 22ko 32/2020 Foru Dekretuaren bidez onetsiak, ezartzen duen betebeharra ez betetzea. Ondorioak izan ditzakeen prozedura bat hasten denetik betebeharra bete arte zenbatuko da luzamendua.»

### **Azken xedapenetako laugarrena. Indarrean jartzea eta ondorioak izatea.**

Foru dekretu hau eta erantsita duen erregelamendua Gipuzkoako Aldizkari Ofizialean argitaratzen diren egunean jarriko dira indarrean, eta 2022ko urtarrilaren 1etik aurrera izango dituzte ondorioak.

## **ERANSKINA**



# TICKETBAI BETEBEHARRA GARATZEN DUEN ERREGELAMENDUA

|   |    |
|---|----|
| ATARIKO KAPITULUA. XEDAPEN OROKORRAK. ....  | 9  |
| 1. artikulua. Xedea.....  | 9  |
| 2. artikulua. Aplikazio eremua.....   | 10 |
| 3. artikulua. Definizioak eta erreferentziak. ....  | 10 |
| I. KAPITULUA. BETEBEHARRAREN APLIKAZIO EREMUAREN MUGAK. SALBUESPENAK.....                             | 11 |
| 4. artikulua. TicketBAI betebeharratik salbuestea. ....   | 11 |
| 5. artikulua. QR kodea fakturan edo frogagirian jartzetik salbuestea. ....                            | 12 |
| 6. artikulua. Beste salbuespen batzuk. ....   | 12 |
| II. KAPITULUA. TICKETBAI BETEBEHARRA BETETZEA. ....   | 12 |
| 7. artikulua. TicketBAI betebeharra betetzeko gaitutako pertsonak.....                                | 12 |
| 8. artikulua. TicketBAI betebeharra betetzeko baliabide informatikoak. ....                           | 13 |
| III. KAPITULUA. TICKETBAI SOFTWAREAREN BEHARKIZUNAK. ....   | 13 |
| 1. <i>sezioa. Beharkizunak betetzeko ordena. ....</i>   | 13 |
| 9. artikulua. TicketBAI softwarearen beharkizunak betetzeko ordena. ....                              | 13 |
| 2. <i>sezioa. TicketBAI fitxategiaren sorrera. ....</i>   | 14 |
| 10. artikulua. TicketBAI altako fitxategiaren sorrera. ....   | 14 |
| 11. artikulua. TicketBAI altako fitxategiaren edukia. ....  | 14 |
| 12. artikulua. TicketBAI baliogabetze fitxategiaren edukia. ....                                      | 15 |
| 13. artikulua. Fitxategi informatikoen sinadura elektronikoa. ....                                    | 16 |
| 3. <i>sezioa. TicketBAI fitxategiaren bidalketa.....</i>  | 16 |
| 14. artikulua. TicketBAI fitxategiak Zerga Administrazioa bidaltzea. ....                             | 16 |
| 15. artikulua. Eragiketaren hartzaileak TicketBAI fitxategiak bidaltzea.....                          | 16 |
| 4. <i>sezioa. Fakturan edo frogagirian TicketBAI betebeharraren irudikapena jasotzea. ....</i>        | 16 |
| 16. artikulua. TicketBAI kodea eta QR kodea. ....   | 17 |
| 5. <i>sezioa. Gorabeherak TicketBAI betebeharra betetzean. ....</i>                                   | 17 |
| 17. artikulua. Gorabehera teknikoak TicketBAI betebeharra betetzean. ....                             | 17 |
| IV. KAPITULUA. TICKETBAI FITXATEGIAK GORDETZEA. ....  | 17 |
| 18. artikulua. TicketBAI fitxategiak gorde beharra. ....  | 17 |
| V. KAPITULUA. TICKETBAI BETEBEHARRA BETETZEN DELA ZIURTATZEA. ....                                    | 18 |
| 19. artikulua. Hartzaileak TicketBAI betebeharra betetzen duela ziurtatzea. ....                      | 18 |
| 20. artikulua. Zerga Administrazioak TicketBAI betebeharra betetzen dela ziurtatzea.....              | 18 |
| VI. KAPITULUA. TICKETBAI SOFTWAREAREN ERREGISTROA. ....   | 18 |
| 21. artikulua. TicketBAI Softwarearen Erregistroa. ....   | 18 |
| 22. artikulua. TicketBAI Softwarearen Erregistroan inskribatzea. ....                                 | 18 |
| 23. artikulua. TicketBAI Softwarearen Erregistrotik baztertzea. ....                                  | 19 |
| Lehen xedapen gehigarria. TicketBAI altako fitxategiaren edukia faktura sinplifikatuaren kasuan. .... | 20 |
| Bigarren xedapen gehigarria. Bidaia agentziak. ....   | 20 |
| Azken xedapen bakarra. Arauak emateko ahalmena. ....  | 20 |

## Atariko kapitulua. Xedapen orokorrak.

### 1. artikulua. Xedea.

Erregelamendu honen bidez garatzen da ondasun entrega eta zerbitzu prestazio guztiak dokumentatzen dituzten fitxategi informatikoen osotasuna, kontserbazioa, trazabilitatea, bortxaezintasuna eta igorpena bermatuko dituen sistema informatikoa erabiltzeko betebeharra, hain zuzen ere Gipuzkoako Lurralde Historikoko Sozietateen gaineko Zergari buruzko urtarrilaren 17ko 2/2014 Foru Arauaren 122 bis artikuluan eta Gipuzkoako Lurralde Historikoko Pertsona Fisikoen Errentaren gaineko Zergari buruzko urtarrilaren 17ko 3/2014 Foru Arauaren 112 bis artikuluan ezarritakoa.

## 2. artikulua. Aplikazio eremua.

Erregelamendu hau jarraian aipatzen diren zergadunei aplikatuko zaie, betiere Gipuzkoako Lurralde Historikoko zerga araudia aplikagarri bazaie:

- a) Sozietateen gaineko zergaren zergadunei.
- b)<sup>4</sup> Pertsona fisikoen errentaren gaineko zergaren zergadunei eta errenta esleipeneko entitateei, jarduera ekonomikoak egiten dituztenean.
- c) Ez-egoiliarren errentaren gaineko zergaren zergadunei, errentak establezimendu iraunkor bidez lortzen dituztenean.

## 3. artikulua. Definizioak eta erreferentziak.

Erregelamendu honen ondorioetarako, baita hura garatzen duen araudiaren ondorioetarako ere, kontzeptu hauek bereizten dira:

a) TicketBAI betebeharra: ondasun entrega eta zerbitzu prestazio guztiak dokumentatzen dituzten fitxategi informatikoen osotasuna, kontserbazioa, trazabilitatea, bortxaezintasuna eta igorpena bermatuko dituen sistema informatiko bat erabiltzeko betebeharra, Gipuzkoako Lurralde Historikoko Sozietateen gaineko Zergari buruzko urtarrilaren 17ko 2/2014 Foru Arauaren 122 bis artikuluan eta Gipuzkoako Lurralde Historikoko Pertsona Fisikoen Errentaren gaineko Zergari buruzko urtarrilaren 17ko 3/2014 Foru Arauaren 112 bis artikuluan ezarritakoa.

Definizio hau izaera orokorrez erabili ahal izango da zerga araudian zehar.

b) TicketBAI Softwarea edo software bermatzailea: TicketBAI Softwarearen Erregistroan inskribatutako sistema informatikoa edo programa, jarraibide eta arau informatikoen multzoa, ondasun entregak eta zerbitzu prestazioak dokumentatzen dituzten fitxategi informatikoen osotasuna, kontserbazioa, trazabilitatea, bortxaezintasuna eta igorpena bermatzen dituen, eta Sozietateen gaineko Zergari buruzko 2/2014 Foru Arauaren 122 bis artikuluan, Pertsona Fisikoen Errentaren gaineko Zergari buruzko 3/2014 Foru Arauaren 112 bis artikuluan, erregelamendu honetan eta Ogasun eta Finantza Departamentuko foru diputatuak, haren garapenean, foru agindu bidez onartzen dituen zehaztapen tekniko eta funtzionaletan ezarritakoa betetzen duena.

c) TicketBAI Softwarearen Erregistroa edo Software bermatzailearen Erregistroa: TicketBAI softwarea garatzen duten pertsona eta entitateek eta haiek garatutako TicketBAI softwareek osatutako erregistroa.

d) Pertsona edo entitate garatzailea: pertsona fisiko edo juridikoa, edo nortasun juridikorik gabeko entitatea, TicketBAI Softwarearen Erregistroan inskribatu den TicketBAI software bat garatu duena.

e) Faktura edo frogagiria: paperean edo euskarri elektronikoan eraturako dokumentua, fakturatzeko obligazioak arautzen dituen Erregelamenduak, otsailaren 26ko 8/2013 Foru Dekretuaren bidez onetsiak, ezarritakoaren arabera egina.

f) TicketBAI fitxategiak: altako fitxategiak eta/edo eragiketak baliogabetzekoak, hurrengo bi letretan definituak.

---

<sup>4</sup> Letra hau urriaren 5eko 12/2021 Foru Dekretuaren 8. artikuluko bat apartatuak aldatu du. Aipatutako foru dekretuak Zergen Foru Arau Orokorra garatzeko erregelamendu jakin batzuk aldatzen ditu (2021/10/8ko GAO). Foru Dekretua Gipuzkoako Aldizkari Ofizialean argitaratu eta biharamunean sartzen da indarrean eta aldaketak 2022ko urtarrilaren 1etik aurrera izango ditu ondorioak.

g) Altako fitxategia, eragiketari alta emateko TicketBAI fitxategia, eragiketari TicketBAI softwarearekin alta emateko fitxategia edo eragiketari software bermatzailearekin alta emateko fitxategia: faktura edo frogagiria jaulki aurretik lortzen den XML formatuko fitxategia, erregelamendu honetan xedatutakoa betetzen duena.

h) Baliogabetze fitxategia, eragiketa baliogabetzeko TicketBAI fitxategia, eragiketa TicketBAI softwarearekin baliogabetzeko fitxategia, eragiketa software bermatzailearekin baliogabetzeko fitxategia: faktura edo frogagiria baliogabetu aurretik lortzen den XML formatuko fitxategia, erregelamendu honetan xedatutakoa betetzen duena.

i) TicketBAI kodea edo identifikazio kodea: kode alfanumerikoa, TicketBAI software batekin sortutako faktura edo frogagiria identifikatzen duena.

j) QR kodea: bi dimentsioko barra kodea, TicketBAI software batekin sortutako faktura edo frogagiri baten identifikazio datuak kodetuta gorde ditzakeena.

k) XML formatua: eXtended Markup Language formatua, hau da, etiketak markatzeko erabilitako hizkuntza, SGMLtik eratorria, dokumentuen egiturak definitzeko balio duena.

l) Mahaigaineko aplikazioa: TicketBAI softwarea, fitxategi informatiko batean telematikoki banatzen dena, Internet bidez edo euskarri fisiko bidez. Beraz, TicketBAI softwarea erabiltzen duen fakturazio gailu bakoitzean haren kopia fisiko bat dago.

m) Arkitektura banatua duen aplikazioa: zerbitzari batean edo zerbitzari multzo batean zentralizatutako TicketBAI softwarea; beraz, mahaigaineko aplikazioan ez bezala, ez da erabiltzaileen artean banatzen, pertsona horiek bezero arin eta estandar baten bidez sartzten baitira bertara (adibidez, web nabigatzaile baten bidez).

n) Fakturazio gailua: TicketBAI softwarea sartzeko erabiltzen den gailua da, gailu hori softwarearen funtzionamendurako urruneko zerbitzari batean sartzten dela ere. Arkitektura banatuetan, bezeroa izango litzateke gailua.

ñ) 122 bis artikulua: adierazpen horrekin, Gipuzkoako Lurralde Historikoko Sozietateen gaineko Zergari buruzko urtarrilaren 17ko 2/2014 Foru Arauaren 122 bis artikulua aipatzen da.

o) 112 bis artikulua: adierazpen horrekin, Gipuzkoako Lurralde Historikoko Pertsona Fisikoen Errentaren gaineko Zergari buruzko urtarrilaren 17ko 3/2014 Foru Arauaren 112 bis artikulua aipatzen da.

## **I. kapitulua. Betebeharraren aplikazio eremuaren mugak. Salbuespenak.**

### **4. artikulua. TicketBAI betebeharretik salbuestea.**

1. TicketBAI obligazioa betetzetik salbuetsita geldituko dira balio erantsiaren gaineko zergaren nekazaritza, abeltzaintza eta arrantzaren araubide berezian zergapetuta daudenak, betiere otsailaren 26ko 8/2013 Foru Dekretuaz onartutako Fakturazio betebeharreri buruzko Erregelamenduak 16. artikuluko 1. apartatuan aipatutako ordainagiria eginez faktura jaulkitzeko obligazioa betetzat hartu daitekeen eragiketengatik.

2. Zergadunak honako eragiketa hauei dagokienez geldituko dira TicketBAI obligazioa betetzetik salbuetsita:

a) Otsailaren 26ko 8/2013 Foru Dekretuaz onartutako Fakturazio betebeharrei buruzko Erregelamenduak 5. artikuluan jasotakoaren arabera faktura egiteko obligazioa eragiketaren hartzaileak materialki betetzen duen eragiketak, baldin eta hartzaileari ez bazaio exijitzen edo Gipuzkoako Lurralde Historikoan zerga araudian jasotako TicketBAI obligazioa edo Araba edo Bizkaiko lurralde historikoetan jasotako TicketBAI obligazioaren antzeko betebeharrak.

b) Otsailaren 26ko 8/2013 Foru Dekretuaz onartutako Fakturazio betebeharrei buruzko Erregelamenduak bigarren eta bosgarren xedapen gehigarrietan aipatutako eragiketak.

c) Atzerrian kokatuta dauden establezimendu iraunkorren bidez egindako eragiketengatik faktura edo frogagirietan dokumentatzen diren eragiketak.

## **5. artikulua. QR kodea fakturan edo frogagirian jartzetik salbuestea.**

Ez da beharrezkoa izango QR kodea eragiketaren fakturan edo frogagirian sartzea, faktura edo frogagiria bakarrik formatu elektronikoa ez-irakurgarrian egin eta bidaltzen denean.

## **6. artikulua. Beste salbuespen batzuk.**

1. Aurretik interesdunak eskatuta, Ogasun Zuzendaritza Nagusiak kasu hauetan ebatzi ahal izango du TicketBAI obligazioa betetzearen salbuespena:

a) Enpresa sektoreei edo pertsona profesionalei edo enpresa jakin batzuei dagokienez, dena delako sektoreko praktika komertzial edo administratiboengatik justifikatuta gelditzen denean, edo enpresa edo lanbide jarduerak egitean nahasmenduak saihesteko.

b) Obligazio hori betetzea galarazten duten aparteko zirkunstantzia teknikoak hautematen zaizkien eragiketei dagokienez. Salbuespen hori aldi baterakoa izango da, eta hura aplikatzeko baldintza izango da eragiketa horiei dagokienez aipatutako obligazioak bete ahal izateko behar diren egokitzapenak egiteko konpromisoa hartzea; eta salbuespenaren ondorioak amaituko dira hura hartzea arrazoitu zuten aparteko zirkunstantziak desagertzen direnean.

Apartatu honetan jasotako ebazpenetan baimen bakoitzerako baldintza bereziak ezarri ahal izango dira.

2.<sup>5</sup> Ogasun eta Finantza Departamentuko foru diputatuak TicketBAI betebeharretik salbuesteko beste kasu batzuk ezarri ahal izango ditu, foru agindu bidez, hala justifikatzen duten aparteko zirkunstantziak gertatzen direnean.

Foru aginduan kasu bakoitzerako baldintza bereziak ezarri ahal izango dira.

3. Aurreko apartatuetan jasotako salbuespenak bai TicketBAI betebeharrari berari buruzkoak eta bai 122 bis eta 112 bis artikuluetako 1. apartatuan jasotako haren alderdi jakin batzuei buruzkoak izan daitezke.

## **II. kapitulua. TicketBAI betebeharra betetzea.**

### **7. artikulua. TicketBAI betebeharra betetzeko gaitutako pertsonak.**

---

<sup>5</sup> Eduki honen garapena azaroaren 9ko 608/2021 Foru Aginduak egin du. Aipatutako foru aginduak TicketBAI betebeharraren ezarpen egutegia aldatzen du eta erretiroa hartzeko adinetik hurbil dauden pertsona fisiko jakin batzuk hura betetzetik salbuesten ditu (2021/11/11ko GAO).

1.<sup>6</sup> TicketBAI betebeharra zergadunak edo horretarako izendatutako haren ordezkariak bete ahal izango du materialki, betiere ordezkariak obligazio hori betetzeko ahalmenak dituelarik.

2. TicketBAI betebeharra hirugarren batek edo eragiketaren hartzaileak bete ahal izango du materialki. Kasu horietan, hirugarrenaren edo hartzailearen izaera eduki beharko da, betiere otsailaren 26ko 8/2013 Foru Dekretuaz onartutako Fakturazio betebeharrei buruzko Erregelamenduak jasotakoaren arabera, faktura edo frogagiria egiteko betebeharraren ondorioetarako.

TicketBAI betebeharra materialki hirugarren batek betetzen duenean, zergadunaren araudiari jarraituz bete beharko du, nolana ere azken horren izenean eta kontura jardunez.

3. Pertsona berak aldi berean hirugarren edo hartzaile izaera eta ordezkari baimenduaren izaera duenean, ordezkariaren izaera nagusituko da TicketBAI betebeharraren ondorioetarako.

4. Kasu horietako edozeinetan, zergadunak izango du TicketBAI betebeharra betetzeko erantzukizuna.

## **8. artikulua. TicketBAI betebeharra betetzeko baliabide informatikoak.**

TicketBAI betebeharra betetzeko, sistema informatiko hauetako bat erabili beharko da:

a) Gipuzkoako Foru Aldundiak horretarako garatutako aplikazio informatikoa. Zergadun jakin batzuentzat aplikazioaren erabilpena mugatu ahal izango da, aplikagarri zaizkien zerga araubideari edo zirkunstantzia partikularrei jarraituz. Muga horiek Ogasun eta Finantza Departamentuaren webgunean argitaratuko dira.

Gipuzkoako Foru Aldundiak zergadunaren eskura jarritako aplikazio informatikoa zergadunak berak edo behar bezala baimendutako bere ordezkariak bakarrik erabili ahal izango du, betiere aurreko 1. apartatuan aipatutakoari jarraituz.

b) TicketBAI software bat.

Ogasun eta Finantza Departamentuko foru diputatuak TicketBAI softwareek bete beharreko zehaztapen tekniko eta funtzionalak garatu ahal izango ditu.

## **III. kapitulua. TicketBAI softwarearen beharkizunak.**

### *1. sekzioa. Beharkizunak betetzeko ordena.*

## **9. artikulua. TicketBAI softwarearen beharkizunak betetzeko ordena.**

TicketBAI softwareak 122 bis eta 112 bis artikuluetako 1. apartatuan jarritako beharkizunak bete beharko ditu, ordena honi jarraituz:

Lehena. TicketBAI fitxategi bat sortu beharko du, ondasun entrega edo zerbitzu prestazio bakoitzeko. TicketBAI fitxategia elektronikoki sinatuta egon beharko da, erregelamendu honetan jasotakoaren arabera.

Bigarrena. Faktura edo frogagiria egitearekin batera, TicketBAI fitxategia Gipuzkoako Foru Ogasunera bidali beharko du telematikoki.

---

<sup>6</sup> Eduki honen garapena azaroaren 15eko 614/2021 Foru Aginduak egin du. Aipatutako foru aginduak Gipuzkoako Foru Aldundiko Ogasun eta Finantza Departamentuko zerga ordezkarien errolda arautzen du (2021/11/18ko GAO).

Hirugarrena. Eragiketaren fakturan edo frogagirian TicketBAI kodea eta QR kodea txertatu beharko dira.

## *2. sekzioa. TicketBAI fitxategiaren sorrera.*

### **10. artikulua. TicketBAI altako fitxategiaren sorrera.**

TicketBAI altako fitxategia faktura edo frogagiria egin aurretik sortu behar da, erregelamendu honek 17. artikuluan jasotako aparteko kasuen kalterik gabe.

Zergaduna faktura edo frogagiria egitetik salbuetsita dagoenean, TicketBAI altako fitxategia eragiketa gauzatzen den unean sortuko da.

### **11. artikulua. TicketBAI altako fitxategiaren edukia.**

1. TicketBAI altako fitxategian informazio hau jaso behar da gutxienez:

a) Faktura edo frogagiria egiten duen pertsona edo entitatearen identifikazio fiskaleko zenbakia eta izen-abizenak edo sozietate izen edo izendapen osoa.

b) Otsailaren 26ko 8/2013 Foru Dekretuaz onartutako Fakturazio betebeharrei buruzko Erregelamenduak jasotakoaren arabera derrigorrezkoa denean, identifikazio fiskaleko zenbakia (hala badagokio, Europar Batasuneko edozein estatu kideetako zerga administrazio eskudunak emana) eta eragiketen hartzaile den pertsona edo entitatearen izen-abizenak eta sozietate izen edo izendapen osoa.

c) Adierazi behar da faktura edo frogagiria eragiketak egiten dituen pertsona edo entitate berak edo haien hartzaileek edo hirugarrenek egina ote den, otsailaren 26ko 8/2013 Foru Dekretuaz onartutako Fakturazio betebeharrei buruzko Erregelamenduak 5. artikuluan jasotakoaren arabera.

d) Faktura edo frogagiriaren zenbakia eta, hala badagokio, seriea.

e) Faktura edo frogagiriaren data eta ordua, eta dokumentatzen diren eragiketak egin diren data edo, hala badagokio, ordainketa aurreratua jaso den data, betiere faktura edo frogagiria egin den egunaz besteko data bada.

f) Egindako faktura mota, betiere faktura osoa edo sinplifikatua ote den adierazita.

g) Faktura zuzentzailea bada, otsailaren 26ko 8/2013 Foru Dekretuaz onartutako Fakturazio betebeharrei buruzko Erregelamenduak 15. artikuluan jasotakoaren arabera, haren mota, ezaugarriak eta, bereziki, faktura zuzenduen identifikazioa.

h) Faktura aurretik egindako faktura sinplifikatuen ordeztutako faktura bat bada, ordeztutako faktura sinplifikatuen identifikazioa.

i) Eragiketen deskribapen orokorra.

j) Eragiketa bakoitzaren deskribapena edo fakturaren edo frogagiriaren lerroa, honako hauek jasota: kopurua, balio erantsiaren gaineko zergarik gabeko unitateko prezioa, unitateko prezio horretan sartuta ez dagoen edozein deskontu edo beherapen eta, azkenik, fakturaren edo frogagiriaren eragiketa edo lerro bakoitzaren zenbateko osoa, BEZa barne.

Eragiketaren deskribapenean ez dira jaso behar Europako Parlamentuaren eta Kontseiluaren apirilaren 27ko 2016/679 Erregelamenduak (EB), Datu pertsonalen tratamenduari eta datu horien zirkulazio libreari dagokienez pertsona fisikoak babestekoa den eta 95/46/EE Zuzentaraua indargabetzen duenak, 9. artikuluan jasotakoari jarraituz babestutako datuak.

k) Fakturaren edo frogagiriaren zenbateko osoa eta, hala badagokio, jasandako atxikipenaren zenbatekoa.

l) Balio erantsiaren gaineko zergaren ondorioetarako dokumentatutako eragiketei edo zerga arloan garrantzia duten beste eragiketa batzuei aplikatutako araubidearen edo araubideen adierazpena.

m) Eragiketen zerga oinarria, Balio Erantsiaren gaineko Zergaren abenduaren 28ko 37/1992 Legearen 78. eta 79. artikuluetan jasotakoaren arabera zehaztua, zerga tasa aplikatua edo aplikatuak, balio erantsiaren gaineko zergaren kuota, baliokidetasun errekaruaren mota aplikatua edo aplikatuak eta baliokidetasun errekaruaren kuota. Bereziki, informatuko da eragiketa egin ote duen balio erantsiaren gaineko zergaren araubide sinplifikatua edo baliokidetasun errekaruaren araubidea aplikagarri zaion zergadun batek.

n) Dokumentatzen den eragiketa balio erantsiaren gaineko zergatik salbuetsita badago, zerga oinarri salbuetsiaren zenbatekoa eta salbuespen arrazoien adierazpena.

ñ) Eragiketa balio erantsiaren gaineko zergari lotuta ez badago, eragiketaren zenbatekoa eta zergari ez lotzeko arrazoiak.

o) Aurreko faktura edo frogagiriaren zenbakia eta, hala badagokio, seriea, hura egin den data eta aurreko fakturari edo frogagiriari dagokion TicketBAI fitxategiaren sinadura elektronikoaren lehendabiziko 100 posizioak.

p) TicketBAI softwarearen informazio hau: garatzailearen identifikazio fiskaleko zenbakia eta Gipuzkoako Foru Aldundiak edo, hala badagokio, Arabako Foru Aldundiak edo Bizkaiko Foru Aldundiak emandako alta-inskripzio zenbakia. Informazio hori bat etorri behar da TicketBAI Softwarearen Erregistroan emandako informazioarekin. Era berean, TicketBAI softwarearen izena eta bertsioaren kodea jarri beharko dira.

**2.** TicketBAI altako fitxategian jasota dauden moneta zenbateko guztiak eurotan adierazi beharko dira. Faktura edo frogagiria euroa ez den kontu unitate edo dibisa batean egin denean, aldiz, dena delako bihurtuta egin beharko da, TicketBAI altako fitxategian islatuta gelditu dadin.

**3.** Artikulu honetan aipatutako informazioa TicketBAI altako fitxategian sartu beharko da, betiere Ogasun eta Finantza Departamentuko foru diputatuak foru agindu bidez ezartzen dituen egiturari, edukiari, formatuari, diseinuari eta ezaugarriei dagokienez.

## **12. artikulua. TicketBAI baliogabetze fitxategiaren edukia.**

**1.** Faktura edo frogagiri bat baliogabetu behar denean, baliogabetze fitxategi bat sortuko da, Ogasun eta Finantza Departamentuko foru diputatuak foru agindu bidez ezartzen dituen egiturari, edukiari, formatuari, diseinuari eta ezaugarriei jarraituz.

**2.** Baliogabetze fitxategian informazio hau jaso behar da gutxienez:

a) Faktura edo frogagiria egiten duen pertsona edo entitatearen identifikazio fiskaleko zenbakia eta izen-abizenak edo sozietate izen edo izendapen osoa.

b) Faktura edo frogagiri baliogabetuaren zenbakia eta, hala badagokio, seriea.

c) Faktura edo frogagiri baliogabetua egin den data.

d) TicketBAI softwarearen informazio hau: pertsona edo entitate garatzailearen identifikazio fiskaleko zenbakia, eta Gipuzkoako Foru Aldundiak edo, hala badagokio, Arabako Foru Aldundiak edo Bizkaiko Foru Aldundiak emandako alta-inskripzio zenbakia. Informazio hori bat etorri behar da TicketBAI Softwarearen

Erregistroan emandako informazioarekin. Era berean, TicketBAI softwarearen izena eta bertsioaren kodea jarri beharko dira.

### **13. artikulua. Fitxategi informatikoen sinadura elektronikoa.**

Aurreko artikuluetan aipatutako alta eta baliogabetze fitxategiak elektronikoki sinatu beharko dira.

Sinadura elektronikoa sinadura politikaren zehaztapenetara eta Ogasun eta Finantza Departamentuko foru diputatuak ezartzen dituen beharkizunetara egokitu behar da; foru diputatuak mugak jarri ahal izango ditu, berariazko kasu batzuetan ziurtagiri jakin batzuk erabiltzeko.

#### *3. sekzioa. TicketBAI fitxategiaren bidalketa.*

### **14. artikulua. TicketBAI fitxategiak Zerga Administrazioa bidaltzea.**

1. Faktura edo frogagiria egitearekin batera, TicketBAI softwareak altako fitxategia bidali behar du Zerga Administrazioa bide telematikoz, ziurtagiri elektronikoa onargarri bat erabilia, betiere Ogasun eta Finantza Departamentuko foru diputatuak foru aginduz onartzen dituen zehaztapen tekniko eta funtzionalei nahiz bidalketarako beharkizunei jarraituz.

Baliogabetze fitxategia eragiketaren faktura edo frogagiria baliogabetzen den unean bidali behar da.

2. Ogasun eta Finantza Departamentuko foru diputatuak gizarte lankidetzako tresnak gaitu ahal izango ditu, martxoaren 8ko 2/2005 Foru Arauak, Gipuzkoako Lurralde Historikoko Zergen Foru Arau Orokorrak, 89. artikuluan jasotakoari jarraituz, TicketBAI fitxategiak bidaltzeko.

3. Zerga Administrazioak TicketBAI fitxategiak errefusatu ahal izango ditu, baldin eta erregelamendu honetan eta hura garatzeko onartutako zehaztapen tekniko eta funtzionaletan jasotako beharkizunak eta baldintzak betetzen ez badituzte. Hala gertatuz gero, fitxategi errefusatuak zuzendu egin beharko dira.

4. Frogatzen bada operadoreen bitartez estaldurarik ez dagoela eta sarerako sarbidea ezinezkoa dela, edozein teknologiatako banda zabalean izan edo sare mugikorrean izan, Estrategia Teknologikoko Zuzendariordetza Nagusiak baimendu ahal izango du, aurretik zergadunak eskatuta, geroago TicketBAI fitxategien multzoa Zerga Administrazioa bidaltzeko.

Ogasun eta Finantza Departamentuko foru diputatuak bidalketa geroratua egiteko tokia, modua eta epea ezarriko ditu.

5. Zerga Administrazioa zuzen bidalitako TicketBAI fitxategiak gordailu batean gordeko dira Gipuzkoako Foru Aldundiaren egoitza elektronikoa.

### **15. artikulua. Eragiketaren hartzaileak TicketBAI fitxategiak bidaltzea.**

1. Eragiketaren hartzaileak TicketBAI betebeharra betetzen badu, TicketBAI fitxategiak jaulkitzaileari dagokion zerga administrazioa bidali beharko dira.

2. Bidalketa hori modu hauetako edozeinetan egin beharko da:

a) Eragiketaren hartzaileak bidaliko du, faktura egitearekin batera.

b) Fakturaren egileak bidaliko du, faktura onartu bezain pronto, Ogasun eta Finantza Departamentuko foru diputatuak ezartzen dituen moduan eta tokian.

#### *4. sekzioa. Fakturan edo frogagirian TicketBAI betebeharraren irudikapena jasotzea.*



## **16. artikulua. TicketBAI kodea eta QR kodea.**

1. TicketBAI softwareek sortutako ondasun entregean edo zerbitzu prestazioen faktura edo frogagirik TicketBAI kode bat eta QR kode bat barnean hartu beharko dituzte, Ogasun eta Finantza Departamentuko foru diputatuak ezartzen dituen zehaztapen tekniko eta funtzionalei jarraituz.

2. Aurreko apartatuan aipatutako TicketBAI kodea eta QR kodea barnean hartu ahal izango dira erregelamendu honetako 3. artikuluan jasotako definizioen arabera faktura edo frogagiritzat hartzen diren agirietan bakarrik.

Beraz, ezingo dute TicketBAI kodea eta QR kodea barnean hartu albaranek, faktura proformek edo aurrefakturek, ez eta zorrotz hartuta faktura edo frogagiritzat jotzen ez diren beste agirietan batzuek ere.

*5. sekzioa. Gorabeherak TicketBAI betebeharra betetzean.*

## **17. artikulua. Gorabehera teknikoak TicketBAI betebeharra betetzean.**

1.<sup>7</sup> Aparteko kasuetan, alegia, argindarra joan, suntsiketa, hutsegitea, matxura edo haustura gertatu, edo bestelako zirkunstantzietan, zergadunak ezin badu ez TicketBAI fitxategirik sortu ez faktura edo frogagirik egin TicketBAI softwarea erabiliz eta, gainera, faktura edo frogagiria eragiketa gauzatzeko unean egin behar denean, zirkunstantzia hori Zerga Administrazioari jakinaraziko zaio, eta zergadunak faktura edo frogagiria beste bitarteko batzuk erabiliz egin eta emango dio hartzaileari, haren kopia gordeta.

Faktura edo frogagiria berariazko serie batean utziko da jasota, zeina bakarrik erabiliko baita artikulua honetan xedatutakoaren arabera egindako faktura edo frogagiritarako. Gainera, fakturan edo frogagirian honako hau adieraziko da: «TicketBAI gabe egindako faktura edo frogagiria, gorabehera jakinarazi duena.

2. TicketBAI fitxategiak sortzea eta TicketBAI softwarea erabiliz faktura edo frogagiria egitea eragozten duen arrazoia desagertu bezain pronto, zergadunak egindako faktura edo frogagiri guztien datuak sartu beharko ditu korrelatiboki eta segidan bere TicketBAI softwarean, bai eta TicketBAI fitxategiak sortu eta Zerga Administrazioari bidali ere.

TicketBAI softwarearen bidez egindako faktura edo frogagiria kopia bikoiztutzat hartuko da.

Nolanahi ere, eragiketaren hartzaile bakoitzak egindako faktura edo frogagiriaren kopia bikoiztu bat eskatu ahal izango du, zeinak TicketBAI kodea eta QR kodea barnean hartuko dituen.

3. Aparteko kasuetan, alegia, estaldura aldi baterako galdu, zerbitzu telefoniko edo telematikoa eten, bidalketa sistema matxuratu, edo bestelako zirkunstantzietan, zergadunak TicketBAI fitxategiak sortu bai baina Zerga Administrazioari bidali ezin dizkionean, TicketBAI softwareak elkarren segidan metatuko ditu sortutako TicketBAI fitxategi guztiak, eta konexioa berriro ezarri bezain pronto bidali egingo ditu.

## **IV. kapitulua. TicketBAI fitxategiak gordetzea.**

### **18. artikulua. TicketBAI fitxategiak gorde beharra.**

---

<sup>7</sup> Apartatu hau urriaren 5eko 12/2021 Foru Dekretuaren 8. artikuluko bi apartatuak aldatu du. Aipatutako foru dekretuak Zergen Foru Arau Orokorra garatzeko erregelamendu jakin batzuk aldatzen ditu (2021/10/8ko GAO). Foru Dekretua Gipuzkoako Aldizkari Ofizialean argitaratu eta biharamunean sartzen da indarrean eta aldaketak 2022ko urtarrilaren 1etik aurrera izango ditu ondorioak.

Zergadunek TicketBAI fitxategiak gorde beharko dituzte martxoaren 8ko 2/2005 Foru Arauak, Gipuzkoako Lurralde Historikoko Zergen Foru Arau Orokorrek, 69. artikuluan ezartzen dituen epeetan.

## **V. kapitulua. TicketBAI betebeharra betetzen dela ziurtatzea.**

### **19. artikulua. Hartzaileak TicketBAI betebeharra betetzen duela ziurtatzea.**

1. Identifikazio kodearen edo QR kodearen bidez, faktura edo frogagiriaren hartzaileak ziurtatu ahal izango du, bere eskura jartzen den web aplikazioaren bidez, faktura edo frogagiri bat egiten duten zergapekoek TicketBAI betebeharra bete dutela.

2. Web aplikazioak TicketBAI kodearen edo QR kodearen datuak erakutsiko ditu formatu irakurgarri batean.

Era berean, adierazi behar du Gipuzkoako Foru Ogasunak faktura edo frogagiri ziurtatuari lotutako TicketBAI fitxategia jaso ote duen.

### **20. artikulua. Zerga Administrazioak TicketBAI betebeharra betetzen dela ziurtatzea.**

Zerga Administrazioa agertu ahal izango da, betebeharrak formalak ikertu nahiz egiaztatzeko, zergadunek TicketBAI betebeharra zuzen betetzen dutela ziurtatzearen. Bereziki, egin edo emandako fakturretan TicketBAI betebeharra betetzen dela ziurtatu ahal izango du.

## **VI. kapitulua. TicketBAI Softwarearen Erregistroa.**

### **21. artikulua. TicketBAI Softwarearen Erregistroa.**

1. TicketBAI Softwarearen Erregistroak barnean hartuko ditu 122 bis eta 112 bis artikuluetako 1. apartatuan, erregelamendu honetan eta berau garatzeko Ogasun eta Finantza Departamentuko foru diputatuaren foru aginduz onartzen diren zehaztapen tekniko eta funtzionaltan jasotakoa betetzen dutela adierazi duten garatzaileak, bai eta haiek garatutako TicketBAI softwareak ere.

2. Erregistro horrek errolda izaera izango du, abenduaren 17ko 47/2013 Foru Dekretuaz onartutako Zerga betebeharrak jakin batzuk garatzen dituen Erregelamenduak 3. artikuluan jasotakoaren arabera.

3. TicketBAI Softwarearen Erregistroan inskribatuta dauden TicketBAI software guztiak Gipuzkoako Foru Aldundiaren webgunean argitara emango den zerrenda batean sartuko dira, ondorengo artikuluko 3. apartatuan jasotakoa eragotzi gabe.

4. Elkarrekotasun baldintzak egonez gero, TicketBAI obligazioa beteta dagoela ulertuko da zergadunak Arabako Foru Aldundiak edo Bizkaiko Foru Aldundiak gaitutako erregistro batean inskribatu den software bat erabiltzen duenean, baldin eta hura artikuluko honetan aipatutako TicketBAI softwarearen baliokidea bada. Software horiek aurreko apartatuan aipatutako zerrenda publikoan sartuko dira, hala badagokio.

### **22. artikulua. TicketBAI Softwarearen Erregistroan inskribatzea.**

1. TicketBAI softwareak TicketBAI Softwarearen Erregistroan inskribatu nahi dituzten garatzaileek bertan alta hartu izanaren aitortza bat aurkeztu beharko dute.

2. Alta aitortza telematikoki aurkeztu beharko da, horretarako haien eskura jartzen den formularioa betez. Formulario horrek barnean hartuko du garatzaileak

sinatu beharko duen erantzukizunpeko adierazpen bat. Bertan, hau adierazi beharko du:

a) Inskribatzeko eskatzen den softwareak betetzen duela 122 bis eta 112 bis artikuluetako 1. apartatuan, erregelamendu honetan eta berau garatzeko Ogasun eta Finantza Departamentuko foru diputatuaren foru aginduz onartzen diren zehaztapen tekniko eta funtzionaletan jasotakoa, betiere hura betetzeko erabilitako prozedura teknikoak azaltzen dituen memoria labur bat aurkeztuta.

b) Bere burua behartzen duela aurreko a) letran aipatutako beharkizunak eta baldintzak betetzen jarraitzera erregistroan inskribatuta dagoen denboran, eta konpromisoa hartzen duela hura beharkizun eta baldintza horietan egon daitezkeen aldaketetara egokitzeko.

3. Alta aitorpenean eskatu ahal izango da softwarea aurreko artikuluko 3. apartatuan aipatutako zerrenda publikoan ez argitaratzeko, softwarea eskatzaileak eta berari lotutako pertsona fisiko edo juridikoek bakarrik erabiliko dutenean.

4. Inskribatzeak berekin ekarriko du software inskribatuan akta-inskripzio zenbaki bat ematea, zeina TicketBAI fitxategietan sartu beharko den.

5. Erregistroan alta hartzeak ez du berekin ekarriko Zerga Administrazioak software inskribatua homologatzea.

### **23. artikulua. TicketBAI Softwarearen Erregistrotik baztertzea.**

1. Zerga Administrazioak egiaztatzen duenean erantzukizunpeko adierazpena oinarrian zehazkabea edo faltsua dela edo bertan datuak omititu direla 122 bis eta 112 bis artikuluen 1. apartatuan, erregelamendu honetan eta berau garatzeko Ogasun eta Finantza Departamentuko foru diputatuaren foru aginduz onartutako zehaztapen tekniko eta funtzionaletan jasotakoa betetzeari dagokionez, softwarea baztertu egingo da erregistro horretatik, indarrean dagoen legeria administratiboan jasotako efektu, ondorio eta erantzukizunen kalterik gabe.

2. Softwarea baztertzeko prozedura ofizioz hasiko da, garatzaileari txosten bat jakinaraziz, non jasota utziko diren aurreko apartatuan aipatutako ez-betetzea ekar dezaketen egitateak, zirkunstantziak eta gainerako elementuak.

Prozedura hastea ez da oztopo izango zergadunek txostenean eragindako softwarea erabili dezaten.

3. Softwarearen garatzaileak egoki deritzen alegazioak egin ahal izango ditu, aipatutako jakinarazpena egin eta ondorengo 15 egunetan. Epe berean, aipatutako akatsa edo ez-betetzea zuzendu ahal izango du.

4. Softwarea baztertzeko prozedura honela amaitu ahal izango da, behin zergapekoak aurkeztutako agiriak eta berak egindako alegazioak aztertuta:

a) Estrategia Teknologikoko Zuzendariorde Nagusiaren ebazpen bidez, zeinaren bidez erabakitzen den softwarea TicketBAI softwarearen erregistrotik baztertzea, prozeduran zehar ez-betetzea zuzendu ez denean.

Bazterketa softwarearen garatzaileari jakinaraziko zaio. Softwarea TicketBAI Erregistrotik baztertuta, zirkunstantzia hori jakitera emango da TicketBAI Softwarearen Erregistroko zerrendan eta zergadun erabiltzaileei komunikatuko zaie, zeintzuek ezingo duten eragindako softwarea erabili behin bazterketa zerrenda horretatik argitaratzen denetik 3 hilabete igarota.

b) Jarduketak artxibatuz, baldin eta prozedura izapidetzean:

- Egiaztatzen bada ez direla gertatu prozedura hastea ekarri duten egitateak, zirkunstantziak edo gainerako elementuak.

- Prozedura hastea ekarri duten egitateak, zirkunstantziak edo gainerako elementuak zuzendu badira. Kasu horretan, softwarearen garatzaileak aurrez frogatu beharko dio Zerga Administrazioari bere bezeroei software zuzenduaren bertsio berri bat banatu diela, eta Zerga Administrazioak egiaztapen jarduketak egin ahal izango ditu zentzu horretan.

### **Lehen xedapen gehigarria. TicketBAI altako fitxategiaren edukia faktura sinplifikatuaren kasuan.**

Faktura sinplifikatua egiten bada, ez da derrigorrezkoa izango TicketBAI altako fitxategian erregelamendu honetako 11. artikuluko 1. apartatuaren b) letran aipatutako informazioa sartzea, honako zergadun hauek direnean:

a) Otsailaren 26ko 8/2013 Foru Dekretuaz onartutako Fakturazio betebeharrei buruzko Erregelamenduak 4. artikuluko 3. apartatuan jasotakoari jarraituz Ogasun Zuzendaritza Nagusiak formalizatutako baimenei edo berak hartutako erabakiei dagozkien jarduera sektoreetan jasota dauden zergadunak.

b) Otsailaren 26ko 8/2013 Foru Dekretuaz onartutako Fakturazio betebeharrei buruzko Erregelamenduak xedapen iragankorraren 1. apartatuko a) letran eta 2. apartatuan aipatutako baimenek eragindako sektoreetako zergadunak, bai eta baimen horiek zuzenean eragindako zergadunak ere.

### **Bigarren xedapen gehigarria. Bidaia agentziak.**

Otsailaren 26ko 8/2013 Foru Dekretuaz onartutako Fakturazio betebeharrei buruzko Erregelamenduak hirugarren xedapen gehigarrian jasotako kasuetan, fakturak egiten dituzten bidaia agentziek bete beharko dute TicketBAI betebeharra.

### **Azken xedapen bakarra. Arauak emateko ahalmena.**

Baimena ematen zaio Ogasun eta Finantza Departamentuko foru diputatuari, erregelamendu hau garatu eta aplikatzeko behar diren xedapen guztiak eman ditzan.

## ALDAKETAK

Honako zerrendan foru dekretuak eta erregelamenduak izan dituzten aldaketak jasotzen dira.

### ***12/2021 Foru Dekretua, urriaren 5koa, Zergen Foru Arau Orokorra garatzeko erregelamendu jakin batzuk aldatzen dituena (2021/10/8ko GAO).***

Bere 7. artikulua foru dekretuaren xedapen iragankor bakarraren 1. apartatuaren e) letra aldatzen du, 2022ko urtarrilaren 1etik aurreko ondorioekin.

Bere 8. artikulua erregelamenduaren prezeptu hauek aldatzen ditu 2022ko urtarrilaren 1etik aurreko ondorioekin:

- 2. artikulua b) letra.
- 17. artikulua 1. Apartatua.

### ***608/2021 Foru Agindua, azaroaren 9koa, TicketBAI betebeharraren ezarpen egutegia aldatzen duena eta erretiroa hartzeko adinetik hurbil dauden pertsona fisiko jakin batzuk hura betetzetik salbuesten dituena (2021/11/11ko GAO).***

Bere 1. artikulua foru dekretuaren xedapen iragankor bakarraren TicketBAI betebeharraren ezarpen egutegia aldatzen du, 2022ko urtarrilaren 1etik aurreko ondorioekin.

### ***15/2021 Foru Dekretua, abenduaren 28koa, zeinaren bidez aldatzen baitira TicketBAI betebeharraren Erregelamendua onesten duen foru dekretua, zerga betebeharraren formal jakin batzuk garatzen dituen Erregelamendua, eta Pertsona Fisikoen Errentaren gaineko Zergaren eta Sozietateen gaineko Zergaren Erregelamenduak, eta ondare elementuen eskualdaketan lortutako errentak bi zerga horietan zehazteko 2022an aplikatu beharreko eguneratze koefizienteak onesten baitira (2021/12/30eko GAO).***

Bere 4. artikulua foru dekretuaren lehen xedapen gehigarriaren 1. apartatua aldatzen du, 2022ko urtarrilaren 1etik aurreko ondorioekin.